

Un storia di optimismo – Prome di tres parti

Di Universidad di Kansas pa Esso Libya na Tripoli

Skirbi pa Clyde Harms (clydeharms@yahoo.com)



Hospital pa empleadonan di Esso na Sungei Gerong

Un caminda largo y yen di obstaculo

Lesadonan di mi articulonan ta corda mi odisea pa yega Universidad di Kansas biahando cu tanker di Aruba pa Philadelphia y despues cu bus te Lawrence, Kansas via Norman, Oklahoma. Despues di gradua na aña 1964, mi a pasa den un otro odisea, uno cu a dura mas di dos aña y cu a siña mi cu den bida hopi bes tin obstaculo inespera. Pero mescos cu Candide di Voltaire, mi a mantene semper mi optimismo y na final mi determinacion y perseverancia a triunfa y ami a keda un persona mas fuerte. Esaki ta e prome parti.

Esso Eastern na Soengei Gerong, Indonesia

Algun luna prome cu mi a gradua, a sali den e corant di Universidad di Kansas un anuncio cu un reclutador di Esso lo ta riba campus pa busca futuro empleadonan pa Esso Standard Eastern (ESE). Mi tabata loco pa entrevista cun'e pa mi por bay bek cu Esso, pero e anuncio tabata bisa cu e tabata solamente interesa den graduadonan cu gradonan di Master's of Ph.D. Grandi tabata mi sorpresa ora m'a haya un invitacion di dje mes pa mi bin papia cun'e. Aparentemente, sin cu ami tabata sa, e decano di School of

Business a convence cu, considerando mi experiencianan di bida (casa cu tres yiu), mi logronan na Lago caminda mi a traha 11 aña, specialmente como programmer/systems analyst y mi logro como estudiante, (mi tabata bay gradua number 1 di klas na edad di 33 aña, casa cu tres yiu), mi formacion ta ekivalente na un Master's.

Na final di e entrevista, e representante di Esso a ofrece mi un posicion cu pronto lo bira bashi cu Soengei Gerong, Sumatra. Como mi omo Victor Wever a yeg'i traha hopi aña aya, y e salario y otro beneficianan tabata masha atractivo, mi a acepta di bay New York pa mas entrevista. ESE e tempo ey tabatin actividadnan di exploracion, produccion y mercadeo na paisnan na Africa, Asia y otro paisnan Oriental manera Hapon, Indonesia y Filipinas. ESE hasta tabata opera un planta electrico den un di e paisnan. Mi a pensa cu despues lo mi por laga Sumatra y wordo staciona na un otro luga mas interesante manera Bangkok, Singapore of Kuala Lumpur. E empleadonan Europeo y Americano na Sungei Gerong tabata biba den un luga manera Lago Colony. Nan tabatin scol, hospital y hopi facilidad pa deporte. E casnan tabatin

tur e mueble y artefactonan di casnan Mericano y e cayanan tabata limpi y tabata existi siguridat completo. Unico diferencia grandi cu na Sungei Gerong no tabatin un comisariado ni tiendanan pafo di e Colony caminda por a cumpra cuminda y otro cosnan. Un bes pa luna tabatin un avion cu tabata bay Singapore pa haci compra pa tur hende, pero omo Victor nunca a keha di e fayto aki. Mi a dicidi cu ami y mi famia tambe por biba cu e inconveniencia di traha un lista di compra tur luna. Por cierto, esaki lo impedi nos di gasta placa pa loco.

Cu un bishita di dos dia na New York, mi a regla e detayenan di un contract y mi a acorda cu despues di un vakantie na Aruba, lo mi raporta na oficina di ESE na Rockefeller Center na luna di Augustus. Durante nos vakantie ami y mi famia a cumpra un cantidad di paña Marca FuGe na No.1 Store di Fuchs en Gelbstein den caya grandi di Oranjestad pa nos no tin necesidad di cumpra esakinan na Singapore.

Un di e rekisitonan pa bay Indonesia e tempo ey tabata papia nan idioma, Bahasa Indonesia, un version di Maleis. Mi señora y ami a cuminsa un curso intensivo cu Berlitz tabata duna den e mes edificio caminda mi tabata traha. Bahasa no a resulta hopi dificil pa nos. E tin hopi expresion deriva di idioma Hulandes y Portugues. Cu nos dominio di Hulandes y Papiamentu despues di algun luna ya nos tabata por combersa cu nos docente. Entre tanto ami tabata siña sistema di accounting di Esso Eastern y cera conoci cu tur e hendenan di



Autor dia cu el a gradua di University of Kansas

e compania staciona na New York y esunnan cu tabata staciona den exterior ora cu nan bishita nos oficina. Lunanan a pasa, aña 1964 a caba y nada di nos visa pa Indonesia. Nos tabata sospecha cu e conflicto cu Sukarno tabatin cu Inglaterra y otro paisnan tocante e formacion di e Federacion Malaysia lo tabata afecta nos aplicacion. Na cuminsamento di 1965 m'a yuda cera bukinan di aña 1964 di e madre empresa Standard Oil of NJ (Esso) y ainda, nada di nos visa. Algun luna despues nos sospechonan a bira realidad. Aunke Hulanda no tabata involvi den e conflicto, Indonesia a rechasa nos aplicacion pa via di nos afinidad cu Hulanda. Tur e preparacionnan pa bay Indonesia tabata en vano. Esaki tabata fin di e prome parti di mi odisea,

pero mas problema y obstaculo tabata na caminda pa pone na prueba mi optimismo y forsa spiritual di mi famia. Parti number dos lo sali otro siman.

Epilogo na e parti aki: Añanan despues na Tripoli mi a haci conoci cu John Binde-man un Accountant cu Esso kende a bin di Soengei Gerong pa traha cu Esso Libya. John a conta mi cu ta bon mes mi no a bay aya. Aparentemente e servicio di siguridat Americano a descubri un plan di e teroristanan comunista pa likida un cantidad di stranhero, Mericano y Europeo. E lista di e 'candidatonan' no tabatin number, solamente e posicion di e persona. E posicion cu ami mester a tuma na Soengei Gerong tambe tabata riba e lista. No hay mal que por bien no venga. □



Cancha di tennis pa expats na Sungei Gerong



Algun cas di expats na Sungei Gerong.